

ქალაქ თბილისის მუნიციპალიტეტის საკრებულო

დადგენილება №

2022 წლის --- -----

ქ. თბილისი

„ქალაქ თბილისის ადმინისტრაციულ საზღვრებში სატრანსპორტო საშუალებების პარკირების რეგულირების წესისა და პარკირების საფასურის დადგენის შესახებ“ ქალაქ თბილისის მუნიციპალიტეტის საკრებულოს 2016 წლის 27 დეკემბრის №33-99 დადგენილებაში ცვლილების შეტანის თაობაზე

საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის მე-2 პუნქტისა და „ნორმატიული აქტების შესახებ“ საქართველოს ორგანული კანონის მე-20 მუხლის მე-4 პუნქტის შესაბამისად, ქალაქ თბილისის მუნიციპალიტეტის საკრებულო ადგენს:

მუხლი 1.

„ქალაქ თბილისის ადმინისტრაციულ საზღვრებში სატრანსპორტო საშუალებების პარკირების რეგულირების წესისა და პარკირების საფასურის დადგენის შესახებ“ ქალაქ თბილისის მუნიციპალიტეტის საკრებულოს 2016 წლის 27 დეკემბრის №33-99 დადგენილებაში (სსმ, ვებგვერდი: www.matsne.gov.ge, 30/12/2016, სარეგისტრაციო კოდი: 310060000.35.101.016353) შევიდეს ცვლილება და დადგენილების პირველი მუხლით დამტკიცებული ქალაქ თბილისის ადმინისტრაციულ საზღვრებში სატრანსპორტო საშუალებების პარკირების რეგულირების წესის:

ა) მე-8 მუხლის პირველი პუნქტის „ზ“ ქვეპუნქტი ჩამოყალიბდეს შემდეგი რედაქციით:
„ზ) „A“ კატეგორიის ნებართვის მქონე ტაქსის (რომელზეც განთავსებულია ქალაქ თბილისის მუნიციპალიტეტის საკრებულოს შესაბამისი სამართლებრივი აქტით დადგენილი ტაქსის აღმნიშვნელი თეთრი ფერის მანათობელი ნიშანი მასზე დატანილი შავი ფერის წარწერით „TAXI თბილისი“) პარკირებისათვის. ამ სპეციალური პარკირების ადგილის დამდგენი მანიშნებელი განისაზღვრება დანართი 7-ის შესაბამისად;“

ბ) მე-10 მუხლის მე-3 პუნქტი ჩამოყალიბდეს შემდეგი რედაქციით

„3. პარკირების საფასურის გადახდისას მიეთითება სატრანსპორტო საშუალების რეგისტრაციის ნომერი (სახელმწიფო სანომრე ნიშანი და ნიშნები), შიდა ტრანზიტი, ტრანზიტული ნომერი ან „TEST“ ნომერი, ხოლო ზონის მიხედვით დადგენილი პარკირების საფასურის გადახდისას ასევე მიეთითება იმ ზონისა და პარკირების ადგილის ნომერი, რომელშიც პარკირებულია სატრანსპორტო საშუალება. საფასურის გადახდისას ზემოაღნიშნული ინფორმაციის მიუთითებლობა ან არასწორად მითითება ჩაითვლება დადგენილი პარკირების საფასურის გადაუხდელობად.“.

მუხლი 2.

ეს დადგენილება ამოქმედდეს გამოქვეყნებისთანავე

**„ქალაქ თბილისის ადმინისტრაციულ საზღვრებში სატრანსპორტო საშუალებების
პარკირების რეგულირების წესისა და პარკირების საფასურის დადგენის შესახებ“ ქალაქ
თბილისის მუნიციპალიტეტის საკრებულოს 2016 წლის 27 დეკემბრის №33-99
დადგენილებაში ცვლილების შეტანის თაობაზე“**

ქალაქ თბილისის მუნიციპალიტეტის საკრებულოს დადგენილების პროექტის

განმარტებითი ბარათი

ა) ქალაქ თბილისის მუნიციპალიტეტის საკრებულოს დადგენილების პროექტის (შემდგომში-პროექტი) მიღების (გამოცემის) მიზეზი და მისი ძირითადი დამახასიათებელი ნიშნები:

„ქალაქ თბილისის ადმინისტრაციულ საზღვრებში სატრანსპორტო საშუალებების პარკირების რეგულირების წესისა და პარკირების საფასურის დადგენის შესახებ“ ქალაქ თბილისის მუნიციპალიტეტის საკრებულოს 2016 წლის 27 დეკემბრის №33-99 დადგენილებით (შემდგომში - №33-99 დადგენილება) დამტკიცებული წესის (შემდგომში - წესი) მე-8 მუხლის პირველი პუნქტის „ზ“ ქვეპუნქტით დადგენილია, რომ ქალაქ თბილისის მუნიციპალიტეტის მთავრობა უფლებამოსილია განსაზღვროს სპეციალური პარკირების ადგილები და პირობები „A“ კატეგორიის ნებართვის მქონე ტაქსის პარკირებისათვის. ბოლო დროს ხშირია შემთხვევები, როდესაც ნებართვების მფლობელები სარგებლობენ ზემოაღნიშნული ჩანაწერიდან გამომდინარე ქალაქ თბილისის მუნიციპალიტეტის მთავრობის შესაბამისი განკარგულებით ტაქსის პარკირებისათვის გამოყოფილი ადგილებით, თუმცა უგულვებელყოფენ „საქართველოს დედაქალაქის ადმინისტრაციულ საზღვრებში მსუბუქი ავტომობილით – ტაქსით (M₁ კატეგორია) გადაყვანის სანებართვო პირობების, ნებართვის გაცემის წესის, ნებართვის მოქმედების ვადის, ნებართვის გაცემის ფასისა და მისი გადახდის წესის, სანებართვო მოწმობის ფორმის, ნებართვის მქონე პირების შესახებ ერთიანი საინფორმაციო ბაზის შექმნის, განახლების და დამუშავების წესის განსაზღვრის შესახებ“ ქალაქ თბილისის მუნიციპალიტეტის საკრებულოს 2018 წლის 27 ივლისის №24-80 დადგენილების მოთხოვნას, რომლით დამტკიცებული წესის მე-8 მუხლის პირველი პუნქტის „ა“ და „ბ“ ქვეპუნქტების მიხედვით „A“ კატეგორიის ნებართვის მფლობელი, ნებართვის მოქმედების მთელი ვადის განმავლობაში, ვალდებულია დაიცვას შემდეგი სანებართვო პირობა: მომსახურების გაწევისას გამოიყენოს ამ წესის შესაბამისად განსაზღვრული მანათობელი ნიშანი; მომსახურების გაწევისას მანათობელი ნიშანი განათავსოს სატრანსპორტო საშუალების ძარის ზედა ნაწილის (სახურავის) შუა ადგილზე გარდა იმ შემთხვევისა, როდესაც სატრანსპორტო საშუალების ძარის ზედა ნაწილი (სახურავი) შუშისაა (პანორამა), რა დროსაც მანათობელი ნიშანი შეიძლება განთავსდეს სატრანსპორტო საშუალების ძარის ზედა ნაწილზე (სახურავზე). აღნიშნულიდან გამომდინარე მიზანშეწონილია წესის მე-8 მუხლის პირველი პუნქტის „ზ“ ქვეპუნქტით დაზუსტდეს, რომ ქალაქ თბილისის მუნიციპალიტეტის მთავრობა უფლებამოსილია განსაზღვროს სპეციალური პარკირების ადგილები და პირობები „A“ კატეგორიის ნებართვის მქონე ტაქსის (რომელზეც განთავსებულია ქალაქ თბილისის მუნიციპალიტეტის საკრებულოს შესაბამისი სამართლებრივი აქტით დადგენილი ტაქსის აღმნიშვნელი თეთრი ფერის მანათობელი ნიშანი მასზე დატანილი შავი ფერის წარწერით „TAXI თბილისი“) პარკირებისათვის.

რაც შეეხება წესის მე-10 მუხლის მე-3 პუნქტის მოქმედ რედაქციას, მასში აღნიშნულია, რომ პარკირების საფასურის გადახდისას მიეთითება სატრანსპორტო საშუალების რეგისტრაციის ნომერი (სახელმწიფო სანომრე ნიშანი და ნიშნები), შიდა ტრანზიტი,

ტრანზიტული ნომერი ან „TEST“ ნომერი, თუმცა არ არის დადგენილი ზონის მიხედვით დადგენილი პარკირების საფასურის გადახდისას გადახდის პირობები. ამავე დროს, №33-99 დადგენილების მე-3 მუხლის მე-2 პუნქტით დამტკიცებულია სატრანსპორტო საშუალების პარკირების საფასურები 3 ზონის მიხედვით და სამივე ზონაში სხვადასხვა საფასურია დადგენილი (პირველ („A“) ზონაში 1 საათი – 1 ლარი; მე-2 („B“) ზონაში 1 საათი – 2 ლარი; მე-3 („C“) ზონაში 1 საათი – 3 ლარი), ხოლო მე-2 მუხლის მე-2 პუნქტის მიხედვით ზონალური პარკირების ადგილებს და მათზე პარკირების საფასურის გადახდის მეთოდებს განსაზღვრავს ქალაქ თბილისის მუნიციპალიტეტის მთავრობა და მთავრობის 2019 წლის 19 ივნისის №19.670.876 განკარგულებით განსაზღვრულია ზონალური პარკირების ადგილები (მოქმედებს მხოლოდ პირველი („A“) ზონა) და მათზე პარკირების საფასურის გადახდის მეთოდები. არსებული წესი არ ითვალისწინებს ჩანაწერს, რა უნდა მიუთითოს მძღოლმა/მესაკუთრემ პარკირების საფასურის გადახდისას, როდესაც სატრანსპორტო საშუალებას აჩერებს ზონალური პარკირების ადგილზე. შესაბამისად ხდება მოქმედი პარკირების წესის დახვეწა და მე-10 მუხლის მე-3 პუნქტში ემატება ჩანაწერი, რომ ზონის მიხედვით დადგენილი პარკირების საფასურის გადახდისას ასევე მიეთითება იმ ზონისა და პარკირების ადგილის ნომერი, რომელშიც პარკირებულია სატრანსპორტო საშუალება საფასურის გადახდისას ზემოაღნიშნული ინფორმაციის მიუთითებლობა ან არასწორად მითითება ჩაითვლება დადგენილი პარკირების საფასურის გადაუხდელობად და გამოიწვევს კანონმდებლობით გათვალისწინებული შესაბამისი ღონისძიებების გატარებას.

ყოველივე ზემოაღნიშნულის გათვალისწინებით შემუშავდა წარმოდგენილი პროექტი.

ბ) იმ შედეგების საფინანსო-ეკონომიკური გაანგარიშება, რასაც გამოიწვევს პროექტის მიღება (გამოცემა):

დადგენილების ამოქმედებისთვის დამატებითი საბიუჯეტო სახსრები საჭირო არ არის.

გ) ბავშვის უფლებრივ მდგომარეობაზე ზეგავლენის შეფასება, რასაც გამოიწვევს პროექტის მიღება (გამოცემა):

დადგენილების ამოქმედება არ მოახდენს ზეგავლენას ბავშვთა უფლებრივ მდგომარეობაზე.

დ) პროექტის ავტორი:

ქალაქ თბილისის მუნიციპალიტეტის მერია.

ე) პროექტის წარმდგენი:

ქალაქ თბილისის მუნიციპალიტეტის მერი.